



**Innuttaasunut, aalisartut, piniartut savaatillillu inuussutissarsiorlutik ingerlatsinerminni silap allanngoriartorneranut attuumassutilimmik ajunaarnersuarmut assingusumik eqqugaasut aningaasatigut ikiorserneqarnissaat siunertaralugu Naalakkersuisut Aningaasanut Inatsimmi kontumik nutaamik pilersitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Kontumik pilersitsinerup peqatigisaanik kattuffiit attuumassuteqartut suliamut akuliutsinnerisigut ikiorsisarnermik aaqqissuussinermut periusissanik aalajangersaanissamik Naalakkersuisut suliaqassapput, tamanna kontumi pingaarnermi oqaasertaliinikkut imaluunniit namminerisamik inatsisissatut siunnersuuteqarnikkut pissaaq.**

(Inatsisartunut ilaasortaq Agathe Fontain, Inuit Ataqtigiit)

(Siullermeerneqarnera)

Qujanaq Inatsisartunut ilaasortaq Agathe Fontain, Inuit Ataqtigiit uunga siunnersuummut.

Tamatta isumaqatigiissinnaagunarpugut, nunarsuarmi tamarmi silaannaap allanngornera aamma maani Kalaallit Nunaanni malugisinnaagatsigu. Tamanna assortugassaangilaq. Assortugassaangilaq aamma, aalisartunut, piniartunut savaatillinnullu inuussutissarsiorlutik ingerlatsinerannut kinguneqarnerlussinnaammat, inuussutissarsiorlutik taakku naleqqussartariaqalernerannik piunasaqaatitaqartumik.

Siunnersuuteqartup uuminnga siunnersuuteqarnermini kissaatigaa, Aningaasanut Inatsimmi kontu pingaarnermik pilersitsisoqassasoq ajunaarnersuaqartillugu ikiorsiinnermut atugassatut soorlu aalisartunut, piniartunut savaatillinnullu, inuussutissarsiumminnik ingerlatsisillutik tassanngaannaq ajunaarnersuurtut ittumik eqqorneqassagaluarpata, nunarsuarmi tamarmi silaannaap allanngoriartorneranut attuumassutilimmik.

Siunnersuut takuinnarlugu tapersernarpoq, ajoraluartumilli siunnersuut amigaateqarpoq, isumarput malillugu nassuiartarialimmik:

Aningaasat qassit immikkoortinneqassappat kontumut taama ittumut? Qanormitaavami matussuserniarneqarpat? Qaqugukkut ajunaarnersuarmik paasineqartassava? Qaqugukkut ajunaarnersuarmik paasineqartassava, nunarsuarmi tamarmi silaannaap allanngoriartorneranut attuumassutilittut? Pinngortitap unammillertaratigut, maani nunami takornartaangilaq. Silarluit anorersuillu atuussimapput, silaannaap allanngoriartorneranik taaneqartalenera sioqquterujussuarlugu.

Amigaatit tamakku siunnersuummut isummerniarnermut ajornakusoortitsippat, uagullu taakku paaseqqaarnissaat pingaartutut isigaarput, Inatsisartut aalajangiinnginneranni, siunnersuut tapersernartuunersoq tapersernartuunnginnerorluunniit. Sowqutiginassagaluarpoq siunnersuuteqartup taakkununnga eqqarsaatai tusassallugit.



Tamanna tunngavigalugu Demokraatit siunnersuut Aningaasaqarnermut- aamma Akileraartarnermullu ataatsimiititaliami suliareqqinneqarnissaa innersuussutigaa. Siunertaralugu, apequtit, uani siunnersuummi taakkartorneqartut, paasilluarnissaat.